



kat.komp.

220198



Mag. St. Dr.

P

Feol. 5209.

*Trumowia Michaelis Stanislai: Arbor in fertili Luth-
eria plantata solo, a benigniori exarata sole, co-
piosis referta fructibus B. Joannes Cantarus.*

ARBOR

40.

IN FERTILI ECCLESIAE PLANTATA SOLO,
à BENIGNIORI EXCOCTA SOLE,
COPIOSIS REFERTA FRUCTIBUS,

B. JOANNES CANTIUS,

In Alma Universitate Cracoviensi,
Sacrae Theologiae Doctor & Professor,
REGNI POLONIAE & ACADEMIAE CRAC:

PATRONVS,



*Admirabili Vitae Sanctimonia,
& Miraculorum Gloria indeficiente*

ILLUSTRIS,

Annuo Solennitatis Festo recurrente,
in Ecclesia Collegiata Neo-Sandecensi,
praesente magna Illustrium Hospitum Corona,

P E R

M. MICHAELEM STANISLAUM
SZUMOWICZ Cracov:

*In Eadem Alma Universitate Cracoviensi, Philosophia Doctorem,
Scholae Neo-Sandecensis Directorem,*

devotâ Panegyri

DEMONSTRATIVS.

Anno Jubilei Magni 1700. Die 19. Octobris.

CRACOVIAE, Typis UNIVERSITATIS.

IN STEMMA,
VENERABILIS CAPITULI
NEO-SANDECENSIS.



220798 in

MARGARIS Illustri Signo, Palmâq; decora,
Dum Colubrum vincit, sternit & ante pedes:
VOBIS PRÆLATI celebres geminare triumphos,
Nititur Herois, quos regit alma sinu.

PERILLUSTRIBUS,
& ADMODUM REVERENDIS DOMINIS,
DD. PRÆLATIS
& CANONICIS,
TOTIq; VENERABILI CAPITVLO,
INSIGNIS ECCLESIAE COLLEGIATÆ
NEO-SANDECENSIS,
Dominis & Patronis Munificentissimis.



Roceram, & eximiarum Virtutum celsitudine sidea tangentem, opimis & optimis meritorum fructibus opulentam Arborem, amœnissimo Cordium Vestrorum Vireto, implantandam esse duxi. Perillustres & Admodum Reverendi Domini. Quippe fecundissimum

animorum solum, quod aureus sapientie imber, & assidua Virtutum temperies, in Vobis excolunt, cognatum huic Diviniori Arbore, exhibet genus; imò sudum illud, & amœnitas mentium Vestrarum, laureatam Dodonam, totumq; circumferens Parnassum, cum ipso terrestri Parnasso certare videtur, & illustris Magnorum Prælatorum Corona, hortum Eden exhibere; in quo exporrecta & serena frons Senatûs Vestri nulla foivet dumeta: ubi effulgent calthæ, adamante perenni; ubi Eois purpurascentes coloribus rosæ; ubi gemmantia lilia; ubi omnium Virtutum inscripti nomina Regum nascuntur flores; ubi quaterno recursum crystallini latices de fontibus Salvatoris promanant, aurâq; cœlestis placido spirans interstrepit susurro; ubi quietam omnigena virtutis sedem, & malatiam, in bono firmati animi nulla ferreo seculo debacchantis fortune tempestas inturbat. Et certè non modica jam ex Vestro cultu, inter montana hac mystica Arbor sumpsit incrementa, Enthelurgicæ CANTIANÆ sanctitatis vigor, adeò in Vobis auctus ampliatumq; est, ut orthodoxus populus, Vestris exemplis, ad degustandos ex hac Arbore gratiarum fructus, fidelibus votis concurrens felicitati suæ duxerit, amplissimum Collegium Vestrum, tam eximijs Viris, magnis Ecclesiæ Dei luminibus & columinibus abundare. Quot enim hic insigni virtute & eruditione pollentes Prælatos spectare licet? quot immarcescibilibus Laureis insignitos Doctores

intueri fas est? quot Divinis humanisq; literis eruditos Senatūs Vestri Troceres, non sine palma zeloſo anhelitu, pro gloria Numinis altiffimi, pro veneratione Divorum, eorumq; edificandis Baſilicis, ornandisq; axis ac pulvinaribus ſolicitos? tot ſacrorum Duces, & dignos diphthera Iovis Heroes, convenit venerari. Non invidemus aureos Delphis Tripodes, mellitos Athenis Iſocrates, religioſos Roma Pompilios, & eximia probitatis Auguſtos, integerrimos Græcia Ariſtides, iuſti æquive moderatores, & Patres orphanorum Mycerinos; dum inſignis Collegiata Veſtra Theoſophiæ & Canonica veritatis Oracula, cedris immortalibus digna, nectar diviniore Svadæ, copioſius profundat, dum cultus juſtiæ, rigorq; honeſti, dum decor Eccleſiæ Dei, ſuum Capitolium, & æternum triumphum in Vobis ſortiat. Hortus certè eſt, inchoſum Collegium Veſtrum, cui ſerenos ſine nube dies geminat Sol in Gentilitia Virgine Veſtra; hortus palmarum & laurearum eſt, in quo ſub auguſta Triumphatrice Veſtra MARGARETHA, ipſi pretioſiſſimi Eccleſiæ uniones, candore virtutum & ſapientiæ, decus Sponſæ in immenſum augetis. Emiſſiones Veſtra Paradifus, quia odor præcelſi Nominis Veſtri, tante ſuaſitatis eſt, ut etiam Superos, ad delicias ſuas inuitet. Quare cum iam olim fixerit honoris ſui radices, in cordibus Veſtris, Vitalis Arbor CANTIVS, certè aucto Veſtrâ ſollicitudine ipſius cultu, felicius hodie perennabit. In hac Eccleſia, licet ad nouercantes Decembris ſerías, ſpectatum tamen gratâ vice Veris & Favoni cœleſtis experietur Maium, dum aſſociata immarceſcibilibus, magna Heroidis Veſtra Palmis, per Sarmaticum Libanum, cedri immortalis inſtar explicans folia, fructus protectionis ſuæ, non æſtatibus, ſed ætatibus, reproducet. Recipite igitur Perilluſtres & Admodum Reverendi Domini, Arborem hanc myſticam, à me, in ſignum obſequentiſſimi cultūs, & propenſi animi teſſeram, Vobis dicatam, implantate eam Hyblæis Cordium Veſtrorum viretis, quæ in illis ingens gratiarum proferet emolumentum, & vitæ longioris propinabit ſuccum: proficui ſaluti Veſtræ erunt Arboris huius fructus, & contra Libitina toxica, efficaciffimum ſuggerent amuletum. Rami eius cælo tenus expaſi Vobis cedent in trophæa, & æterni ſigna triumphī: quod ut Vobis fideli voto apprecor, maneo.

Veſtrarum Perilluſtrium & Admodum
Reverendarum Dominationum



ORATIO.

Inter virentes viventesq; dicatas Alcinoò delicias, inter amplos, & croceis halantes floribus hortos, plerumq; reperiri sterilitatis conscias arbores, extra paradoxum est AA. Quippe jactaverit licet gloriabunda Phæacum Regio feracissima fructuum pometa, scimus tamen etiam steriles platanos eam admisisse. Septeno Orbis miraculorū numero, annumeraverint auríferas Hesperidū arbores rapaci Draconi custodiendas, Pierio de grege plus Phæbo dilecti Vates, attamen pallentes hederas, & amantes littora myrtos, auro onustis arboribus compertum est fuisse socias. Pensiles Semiramidis hortos, basilica sanè opera, usq; ad nauseam ostenta- verit Assyria, verum & hæc, non ex omni parte be- ata; quia expost in tesqua degenerantia, spinas & tribulos germinarunt. Apodicticum est id, quod edis- sero: non omnis etsi majestate procera arbor, ube- res continuò producit partus, non omnis, quamvis in longum latumq; sua explicans folia, amplā fructu- um ingravescit copiā; quæ aut in sterili plantata solo, aut Phœbæi expers caloris, ad tristes & frigidas da- mnata umbras, optato & sibi congruo nequit poti- ri cœli influxu. Cui aut aura non faver, aut pluvius Jupiter recurvas radicum foliorumq; fibras, labenti- bus non irrigat vndis, ideò defectum ipsa cogit pati, ac suarum opum durissimam egestatem. Felix se- creto, quæ nata est arbor in agro, & soli Domino ferre tributa potest, quæ pinguiori data glebæ, sere- niorem Titanis experitur oculum, ac illius vivis pascitur caloribus, quæ irriguis & manantibus de al- titudine nubium aquis, pronos semper ac paratos ad irrigandum præsentat vertices; hæc ferendis fructibus

apta, & conveniens est, ac benignius fecundam copiam fructuum, nullo poscente fundit, ac gravidos fœtus plurimo reddit cum fœnore. Sed quorsû hæc fructuosæ Pomonæ servientia verba facio? quorsum uberes arborum opes laudibus prosequor? cuncta hæc sapiunt mysterium AA. Cùm enim verto sagaces pupillas in D. JOANNEM CANTIUM, nonne in illo cerno hæc omnia? ita sanè. Omnia hæc ex asse Divinissimo Doctore conveniunt: quis non videt solum hoc, cui radices fixerat fertile esse? quis non spectat, spectantē benigniorē Solis Justitiæ radiû? quis nō cernit inæstimabiles fructus, non dētibus, ast mentibus competentes? quis talpâ turpius cæcutit, & toto nisu non applicat aciem oculorum, ad virentia & nullis Æoli furijs obnoxia folia? indeficienter fructificantes in Ecclesia DEI frondes? Verbo Arborem fructiferam esse, quis illum lynce acutiùs non spectat? Cujus fructus non jam stomachi sedant esuriem, cùm hoc & glandibus juglandibusq; ac silvestribus etiam lignis proprium sit, sed præstantiores longè his arbores sunt, quæ mentis non ventris, palatum satiant, recreantq;. Quare minimè hodie à recto veritatis deviabo tramite, sed omnia recti veri; Cultoribus consona proferam, cùm D. JOANNEM CANTIUM, Arborem esse in fertili Ecclesiæ plantatam solo, à benigniori excoctam Sole, copiosis refertam fructibus, tenui orationis apparatu demonstrabo. Nimis Honori Tuo Divinissime DOCTOR, iniurius esse videor, quòd Tuam magnitudinem & excellentiam, quæ ipsis cælestibus æquiparatur Intelligentijs, vnius arboris frondibus metiri præsumpserim, sed addit desperatæ spei levamen, ac generosiori esse jubet animo, ipsum Divinæ Crucis mysterium, omnibus pretiis anteponendum, imò toti Vniverso præponendum; unde cùm etiam ipse triumphaverit à ligno DEUS, & Tu permittes, Tuam dignitatem re-

præsen-

præsentari sub hac rudiori allegoria, ac me sterilis
conscium linguæ copiosissimis fructibus Tuis refici-
es, quod profundissimo voto à Te exposco. Gustate
& Vos vnâ mecum dulces Arboris huius fructus AA.
quos cum iam pomifer gratiæ Autumnus perfectos
proponit, minimè oberunt Vobis, imò proderunt,
tantum à suauitate ipsorum, avidum non amovete ani-
mum, maiorem in modum precor.

Communem Orthodoxorum omniū Matrem,
Sanctam Ecclesiam, amœnissimum Hortum,
cultissimis refertum arboribus esse nemo ambigat. AA.
Quippe quid est fructiferis repletus arboribus hortus?
nonne delicatus quidā locus & felix novorum ortus,
in quo quidquid florida Chloris amœnitatis, ac delici-
arum plantare potest, plantat; ubi quidquid arborei
studiosior fetûs Pomona (quâ nulla Latinas inter Ha-
madryadas diligentius coluit hortos) inferere potest
splendoris, inserit; quæ modò ponit ordine vites, mo-
dò innumeras pyros, ficus, cydonia, pruna feraci re-
ponit in solo. Hortus locus est talis, ubi varietas ocu-
los mentemq; delectat, hîc enim spectatur proles tar-
dè crescentis olivæ, illic nemorū Jovi quæ maxima
frondet esculus, atq; habitæ Graijs oracula quercus,
hîc Parnassia laurus, parva sub ingēti Matris se vmbra
subijcit; illic respondet castiori Paphiæ solido de ro-
bore myrtus, hîc nascuntur duræ corylli, ingensq;
fraxinus, illius ramos latius explicat Herculeæ arbor
umbrosa coronæ; hîc crescit abies visura marinos
casus, illic comiferæ cyparissi, floridis enitēt ramulis,
illic ferunt mala invito stipite pyri. Verbo hortus est
receptaculum exquisitarum arborum, fruticum, flo-
rum, & variarum eiusmodi amœnitatum, ac delicia-
rum. Faciamus actum reflexum, ad communem
Orthodoxorum omnium MATREM, sanctiorem Be-
recynthiam, S. Ecclesiam, an non est, & hæc hortus,
imò Paradisus omnibus gratijs ac virtutibus vernan-

tissimus, qui areolis suis bellè distinctus, ac arte topiariâ affabre dispositus, germinat virtutum omnium flores ac fructus producit: & ut hortus omnes sensus oblectat, & pascit oculos virore plantarum, aures cantu avium, nares odore florum, gustum sapore pomorum, tactum contrectatione eorundem; ita hic hortus mysticus, omnes sensus, omnes mentis potentias, omnes animæ vires, doctrinâ suâ, Sacramentis, ritibus, cæremonijs, virtutibus, exemplis, cæterisq; charismatibus roborat ac recreat. Certitudinis infalibile argumentum addit rei meæ, Magni Gregorij cedro notandum dogma, qui in hunc dicit tenorem: *Hortus Sancta Ecclesia existit, quia dum populos multos in fide gignit, quasi flores pulchros bona terra emittit.* Apage hinc apage, ipsos pensiles Nitocris hortos, apage Salomonis Viridaria paradisi æmula, in quibus volupe erat huic Jessæo Monarchæ, ita ut Herculi aut Agamemnoni plantare platanos, arbores manibus tractare, excolere, ferere; apage, quia in his testatur ipsemet se invenisse vanitatem & afflictionem spiritûs. Ecclesia sanctior hortus est, in quo non afflictiones, sed innumera solatia, non angustia spiritûs, sed vnica animabus spatiantibus per hoc viridarium extat felicitas. Quot acutiori lumine spectas S. Patriarchas, quot interpretes Divû, futuriq; non inscios ævi Prophetas cernis, quot Evâgelicæ veritatis Doctores, Apostolos intueris, quot purpureos Proceres, qui sanguine fuso, per varia æternâ meruerûnt funera palmâ, inspicis, quot eburneo candore conspicuos Confessores vides, quot insigni Sapientiæ munere pollentes Doctores, lynceò apprehendis oculo? tot horti huius paradisiaci virentes arbores copiosissimis refertas fructibus esse intelligas velim, quarum fructus primum continent saporem. Unde Phœbo meridiano clariùs patet, Ecclesiam hortum esse, cultissimis refertum Arboribus. E medio harum Arborum, in hoc Hyblas Hymet-
tosq;

tosq; superante Viridario virentium, etiam Divinissimum Doctorem, Arborem Nostram mysticam prodijisse, & in hoc horto excrevisse quis non agnoscat? Prævidit æternus Alcinous, antequam Orbis vidit, Arborem hanc olim copiosos edituram fructus, ideò fertilem à primis initijs, educendæ huic Arbori, impinguavit areolam. In Submontanis Poloniæ partibus, nostram Arborem nasci permisit, ut summitas ipsa montium, à furentibus & terram turbine perflantibus Aquilonû impetibus, eam sedula custodisset. Vix primùm tenella Arbor nostra prodiit in lucem, illico summus horti huius Præses illam excolere cepit, & ut liberiùs cresceret, Fonte Baptismatis rigari voluit, horto suo implantavit. Crescit Arbor nostra, crescit, quia in fertili Ecclesiastici Paradisi plantata solo; iam illi aura Pneumatis Sanctissimi favet, quâ perfusâ non arescat. Non sic frondibus esculus altis, per nemora Heliadum viret, non sic tyliæ, molles fagus, aut innuba laurus, Adonideis pullulat in hortis, quia hæ fructibus suis, ad vnicum Boreæ flatum orbantur. Nostra autem securo in horto, secura liberè crescit, propagatur, viret, vigetq;. Vix tandem Arbor Nostra crescere incipit, & jam in tenellis ramusculis fructus ostentat, eosq; dulces, quia compositorum morum, ad pietatem, timorem Domini & omne bonum; sed ut feliciùs vireat, traditur dispositione æterni Alcinoi, plurimarum eiusmodi arborum receptatricis ac cultricis Almæ Vniversitatis Cracovientis, vltiori culturæ; vbi pinguem postquam invenerit glebam, uberiores jam jam incipit producere fructus. Multorum admirationi fuit, Divum Doctorem Nostrum, tam tenellam Arborem copiosè fructificare, vbi svaves, sapidî, et si in novella planta apparebant sanctioris modestiæ, nivæ castimoniæ, miræ obedienciæ, ineffabilis diligentia, tam in exercendo timore Di-

C

re Di.

re Divino, quàm in percipiendis artibus fructus. Sed præferet quispiam stupore defixum animum, & mirabitur, vnde hi fructus, qui statim tam dulces, nectareisq; perfusi gratijs reperiuntur, eruperunt? non intricata quæstio AA. qui viret in folijs, venit à radicibus humor; intueamur radicem Arboris huius, scrutemur intimas illius medullas, nullæ aliæ sunt tantummetus filialis Numinis altissimi, profundæ junctus humilitati. Non mirum, quod sit tanta radix, manus enim Domini plantavit, manus Domini irrigavit eam. Arbores copiosos ferentes fructus, ac fertiles earum ramos, scimus perbellè antiquitatem coronasse. Et Nostram mysticam Arborem, tantis onustam fructibus, decuit coronari. Vidit Alma Universitas Cracoviensis, imò gustavit dulces Arboris huius fructus, spectando à teneris profectum in studijs: vidit promanantes delicias pietatis, diligentiae, assiduitatis, ideo Mysticam hanc Arborem debitis illi coronavit laureis. Quis jam hic non assurgat in applausus, Arbori Nostræ Mysticae? quis debitas negabit Panegyres? quæ jam pridem sibi debitis tēpora gestat redimita coronis. Sed ut cuilibet arborū, summus nemorum Præses, ultra & ultra crescere permisit, ita & Arbor Nostra coronata, in immensum crescere incipit, & vberiores proferre fructus addente gloriâ calcar. Gustabat sapidos fructus scientiarum promanantes ab Arbore hac ex Cathedra, numerosa Studioforum turba, alliciebat ipsemet odor fructuum exempli boni, ad sedulam imitationem, plurimos laxam viventes vitam. Plurimorum palato arrisere dulces ex Ecclesiasticis pulpitis promanantes ab hac Arbore succi, & multos laborantes esurie Verbi Divini, reficiebant. Multa paucis concludam, verè Arbor est, cuius fructus non Aheneis circumsepti muris, non ascensu difficilibus
muniti

muniti obstaculis, sanè apud quos nullus excubat draco, prohibens eos carpere, nullæ circumstant excubiæ, quæ sumere vetent. Arbor hæc in propatulo sita, quantum omnibus suos fructus carpentibus addit saporem? non mirum, ardore enim Solis Iustitiæ plurimum excocta est. Quotidie in Mysticam hanc Arborem descendebant radij non solum à Sole Iustitiæ, Viro dolorum JESU, sed etiam à pulchra ut Luna MARIA, quæ luminaria semper sibi præsentia habuit, supplices suos sternendo in oratione ramos, ad imaginem portæ Collegij Maioris præsentem. Maturos fructus istos esse quis negabit? quibus æternus Hyperion, semper fuit verticalis. Arbor hæc non solum per Orbem Polonum, sed etiam per delicatiora Romana vireta, per spatiosa Hierosolymitana Tempe, in quibus Fructus ille cœlestis, quo æternum refecti sumus, ex Arbore Crucis pependit, toties claruit & floruit. Succus Arboris huius, quàm bonæ constitutionis fuerit, per amplum Tomorum in Evangelia Matthæi quaternionem, nonne sufficienter expressus est. Plurimis arboribus ab Authore Naturæ, beneficium medendi datum esse, extra omne dubium est. atsi diligentius spectaverimus Naturam Arboris Nostræ Mysticæ, ferme tota medicina est, quæ non solum mederi, sed etiam appetitum humanum insatiabilem satiare potest. Quàm multi comedentes de hac Arbore esurie nimia, magni de se sensus laborantes Senectiones, per profundos humilitatis fructus esuriem suam sedârunt. Quàm plurimi aliorum famam rodentes, & honestos Theonino dente dilaniantes mores, plurimum appetitum suum, & ad devorandam aliorum famam faciles fauces, Arboris Nostræ fructibus restrinxêre, hoc suavissimum Divi Doctoris apprehendendo amuletum.

Conturbare cave, non est placare suave,

Diffamare cave, nam revocare grave.

Quot Theopompi phthisi laborantes, beneficio Arboris huius,

melius quàm ab Æsculapio sanati sunt? quot Euriti & Aristodemi
 ab extrema lippitudine per fructus Arboris huius liberati sunt? quot
 excæcati Politiani? quot claudi Artemones, quot scelerum furijs
 agitati Orestes? vera Agamemnonis & Clytemnestræ soboles,
 melius ad Arborem hanc, quàm ad aram Dianæ Tauricæ expia-
 vère scelus? quot subitâ morte perempti Andragoræ, vitam hîc
 invenère. Verbo dicam, Divus IOANNES CANTIVS Arbor
 est, quæ plantata in Ecclesiastici horti fertili solo, à sanctiori ex-
 cocta Sole, plurimis profundæ humilitatis, ineffabilis sapientiæ, in-
 comparabilis modestiæ, inenarrabilis sanctimonix, vitæ probitatis,
 & integritatis onusta fructibus, etiam Cœlitibus bellaria proposu-
 it. Imò jam in terram viventium transplantata, æternas gloriæ
 germinat delicias. Quæ cùm ita sint agnoscimus, jam Te
 Dive Doctor, Arborem in fertili Ecclesiæ sitam esse Solo, scimus
 à benigniori excoctam Sole, novimus innumeris refertam fru-
 ctibus. Fave ergo huic horto Tuo, in quo tenellos ramos depo-
 suisti, cùm Te cœlestis Alcinous plantaret, funde svavia oratio-
 nis pro militante Ecclesia, in qua olim in proceram Arborem ex-
 crevisti, nunc sis eius tutamen, decus, & corona. Pressam multà fa-
 me calamitosi temporis, caram Patriam tuam, dulcissimis fru-
 ctibus Tuis reficias posco. Pingviori Horti Tui glebæ Almæ Ma-
 tri Acad. ex qua succum ingenuarū artium traxisti, ac ibidem ex-
 crevisti, illius antea filius cùm fueris, nunc sis Pater & Patronus;
 atq; hanc extensis ramis Tuis, plusquam ære triplici obarmans,
 illos quibusvis insurgentibus Æolorum impetibus opponas. Sub
 vnius platani umbra, quondam ad Basileam cum multa Princi-
 pum cohorte, CAROLVM V. Imperatorem Romanorum, discu-
 buisse legimus; & nos magna cohors petimus, fac omnes discum-
 bere sub umbra Tua, ô Arbor Mystica! vt omnes securè sub Tuo
 discubentes tegmine, possimus in cœlestem Paradisum transplan-
 tari, vbi nunc Tu flores, viges ac perennas; quem ego Arbo-
 rem in fertili Ecclesiæ plantatam Solo, à benigniori exco-
 ctam Sole, copiosis refertam fructibus & vivifi-
 cante gratiarum succo opulentam

D I X I.



Biblioteka Jagiellońska



stdr0020799

